

Fungsi seperti vaksinasi, janji temu masih relevan

(23 April 2022) - Utusan Malaysia, P7

# Mansuh fungsi daftar masuk MySejahtera

Oleh **MOHD. FADHLI MOHD. SULAIMAN**

fadhli.sulaiman@mediamulia.com.my

**KUALA LUMPUR:** Di sebalik desakan pelbagai pihak untuk menyahktifkan aplikasi kontroversi MySejahtera susulan kebimbangan kebocoran data kira-kira 38 juta pengguna, sebahagian fungsi di dalam aplikasi itu seperti daftar masuk premis boleh dimansuhkan bagi mengelak data peribadi pengguna jatuh ke pihak tidak bertanggungjawab.

Bercakap kepada *Utusan Malaysia*, Setiausaha Kehormat, Akademi Perubatan Pekerjaan dan Persekitaran Malaysia, Prof. Madya Dr. Marzuki Isahak berkata, ini kerana fungsi daftar masuk MySejahtera ke premis-premis sudah tidak lagi memenuhi fungsi utama dalam menjejak kontak-kontak rapat Covid-19.

Beliau memberi contoh, seseorang pengguna tidak lagi diklasifikasi sebagai kontak rapat jika mendaftar masuk di sesuatu premis yang ada pengguna lain yang disahkan positif Covid-19.

Malah, data di dalam MySejahtera 'terlalu sibuk dan penuh' akibat terlalu ramai mendaftar masuk beberapa kali pada satu-satu masa di merata tempat.

Kata Marzuki, pengekalan fungsi daftar masuk MySejahtera dibimbangi mengundang pengguna menjadi sasaran pihak tertentu atau pemegang taruh perniagaan dengan memahami pergerakan serta kecenderungan mereka sekiranya memasuki sesuatu premis.

"Maklumat ini sangat berharga untuk sektor perniagaan mencari sasaran pelanggan mereka, apabila kecenderungan mereka mudah diketahui seperti selalu ke kedai pakaian atau pawagam, selepas itu, mereka senang dihubungi pada bila-bila masa.

"Namun, kegunaan lain aplikasi ini masih lagi relevan dan penting untuk dikekalkan seperti sijil vaksinasi, maklumat janji temu. Jadi jangan nyahaktifkan terus, cuma mansuhkan sahaja keperluan daftar masuk ini," katanya.

Terdahulu, dokumen mahkamah mendedahkan Entomo Malaysia, sebelum ini dinamakan KPISoft Sdn. Bhd. bersetuju

memindahkan harta intelek dan lesen perisian MySejahtera kepada MySJ Sdn. Bhd. menerusi perjanjian dilaporkan berjumlah RM338.6 juta yang akan terpakai sehingga akhir 2025.

Ia mencetus kebimbangan awam mengenai penjualan aplikasi itu kepada syarikat swasta yang menurut sesetengah pihak akan membawa kepada pencabulan maklumat peribadi dan ancaman keselamatan negara.

Pada 12 April lalu, akhbar ini melaporkan, memetik sumber polis Bukit Aman bahawa, data peribadi kira-kira 38 juta pengguna MySejahtera seperti nombor telefon, nombor kad pengenalan dan alamat tempat tinggal berisiko dimanipulasi sindiket jenayah antarabangsa untuk kegiatan pemalsuan dokumen dan pelbagai penipuan lain.

Isnin lalu, Pengarang Kumpulan Media Mulia Sdn. Bhd., Mohamad Azlan Jaafar dalam kolom *Minda Pengarang* berpendapat, sudah tiba masanya aplikasi MySejahtera dibuang ke dalam trash bin dan dipadam selama-lamanya serta tidak perlu lagi menggunakannya setiap kali keluar rumah.